


Sel Prestuhn Thomas S. Monson



# Salkweack Orekma uh

**K**uh kom akikhlen lah Alu fohlohkyak se tuh sun yac 98 met liki oasr stek 100 kac? Tuhsruhk suhpuhs liki yac 30 tohkoh, Alu uh oakiyac stek 100 ahkluo la. Ac yac na alkosr tohkohyang puhs liki stek 300 luhn Alu uh. Mihsenge puhs liki stek fokoko 3,000 lasr.

Efuh kuh luhpan kapwack se pihsrpihsr? Ma ke srihpen etweyuck wo kuht? Ma ke srihpen oasr lohm alu wolacna lasr?

Ma inge yohk srihpac, tuhsruhk srihpac ma Alu uh kapwack mihsenge uh pa lah Leum El ahkkahlwemye lah ac kap. Ke Doctrine ac Covenants, El fahk lah el ac salkweack orekma Lal uh ke pacl la uh.<sup>1</sup>

Kuht, tuhlihk nguhn nuhtin Pahpah Lucng uh, suhpweyuckme nuh facluh ke pacl se inge tuh kuht in wi salkweack orekma wowo se inge.

Leum El soenna, ke etuh luhk uh, ahkkahlwemye lah orekma Lal ikolyuck nuh sin mwet moul uh. Sahyacna, orekma Lal uh sruokwacni ma pahtpaht. Nga luhlalfongi muh El salkweack orekma Lal ke facluh luhn nguhn. Nga luhlalfongi pac lah Leum, sin mwet kuhlwacnsap Lal we, ahkoo nguhn pucspucs in eis wosasuc. Orekma lasr uh pa in suk mwet misac lasr uh ac som nuh in tempuhl ac oruh akwuck muhtahl ma fah us nuh selos suc ahluhkweleh mwe lihsrlihsr se pacl wowo oacpacna oasr lasr uh.

Mwet Luhlalfongi wo ke Lwen-sahflah nuh kwewa ke facluh luhn nguhn kahfofo, Prestuhn Brigham Young

el fahk (1801–77). “Meac elos oruh we uh? Elos luti, luti pacl nuh kwewa, ac ahkolah inkacnek lasr in salkweack orekma lasr in muhsahi tempuhl uh yenuh ac kuhtwena acn sahyac.”<sup>2</sup>

Inge, orekma ke sramsram mahtuh luhn sucu uh tiac fihsracsr. Nuh suwos fin acn Scandinavia, nga akacsruhi ke kohs lowos an. Nuh ke mwe srihkasrak, ke lain in sucu Sweden luhk uh, inen pahpah mahtuh tuhmuhk ah pa Nels Monson; inen pahpah tuhmwac ah tiac pa Monson tuhsruhk Mons Okeson. Inen pahpah tuhmwac Mons ah pa Oke Pederson, ac inen pahpah tuhmwac ah pa Peter Monson—sifilpac fohlohk ne ke Monson.

Leum El motko nga kom in oruh orekma ke sramsram mahtuh luhn sucu lasr uh in wo. Nga muh ma se met kuht enenuh in oruh kuht fin ac oruh orekma lasr uh in wo pa in oasr Nguhn luhn Pahpah Lucng yohrohsr. Ke kuht moul in nwacsnwacs oacna ke kuht etuh in moulkihn uh, El ac ikacslah inkacnek nuh ke ahkfalyeyacn mwe inewowo ma kuht suk ke inse pwacye ac oaru uh.

Kuht ac oruh ma tahfonglac uh, tuhsruhk wacngihn sesr kuh in etwacnah na pwacye orekma ke sramsram mahtuh luhn sucu kuht fin tiac sasuc nuh kac met. Pwacnwacng, kuht enenuh in eis kuhtyang nuh ke orekma se inge, ac kuht enenuh in ahkolah nuh ke kuhtuh iwacack uh. Tiac orekma fihsracsr se pa inge, tuhsruhk Leum El fihliyah nuh fom, ac El fihliyah nuh feik.

Ke kom suk orekma ke sramsram mahtuh luhn sucu uh, kom ac konwacack lah kom ac kosrweyucklac, ac kom ac fahk nuh sum sifacna, “Wacngihn ma sahyac nga kuh in oruh.” Ke kom ac sun pacl sacn, puhtati nuh ke intem ac siyuck sin Leum in ikacslah inkacnek an, ac El fah inkacslah inkacnek an nuh sum. Nga fahkwack lah ma se inge pwacye.

Pahpah Lucng El luhngse tuhlihk Nahtuhl ke facluh luhn nguhn oacna ke El luhngse nga ac kom uh. Nuh ke orekma in molwelah mwet misac lasr uh, Mwet Pahluh Joseph Smith el fahk, “Ac inge ke srihpac yohk luhn God uh salkweyuck nuh ke oreklac la, ac ma sruhmuhnyuck sin Mwet Pahluh uh ahkfalyeyuck, ke tohkohsrahi luhn God akwucki fin facluh, ac ma akwucki mahtuh fohlohkyak, Leum El ahkkahlwemye kahlwem nuh sesr orekma ac pacl wowo se inge.”<sup>3</sup>

Kaclos mwet mahtuh lasr ma misac tari ma wacngihn etuh la ke wosasuc, Prestuhn Joseph F. Smith (1838–1918) el fahk, “Ke kampare lasr kaclos uh sein ma kapraclos fah puhtatlac luhkwelos, ac lohsrlohsr raunwelosyak fah kahlmwelihk, kahlwem sac fah tohlohlosyak ac elos fah lohng ke orekma ma oreklac nuh selos sin tuhlihk nahtuhlos yenuh ke facluh luhn nguhn, ac fah wi kowos engan ke oruh lowos ke orekma inge.”<sup>4</sup>

Miliacn nuh ke miliacn ke tuhlihk nguhn nuhtin Pahpah tuhmasr Inkuhsrao suc soenna lohng ke inen Kraist met liki elos misac ac som nuh ke facluh luhn nguhn. Tuh-sruhke inge lutyuck elos ke wosasuc ac tuhpan ke lwen se nga kom fah oruh sukok enenweyuck in sackuhnlah inkacnek kuht in muh kuh in som nuh in lohmi sin Leum ac oruh kaclos orekma ma elos sifacna tiac kuh in oruh.

Tamuhlwel ac tahmtahel wiyuck an, nga fahkwack lah Leum lac fah ahkinsewowoye kuht ke kuht eis ac topuk ke srihke se inge.

---

## LUTI KE PWENG SE INGE

Nuhnkuh ke soko sramsram kom luhngse yohk ke sramsram mahtuh luhn sucu lom an ac akacsruhi ke sramsram soko inge yurin mwet kom muhtwacta yohroh an. Kom ac kuh in luhngse orekmakihn kihsen siyuck ke ip se luhn tuhlihk an ke Pweng luhn Prestuhnsi Se Met (sra puk ahk 6) in ahkkweyacos suc kom muhtwacta yohroh an in akacsruhi ke sramsram lalos

an. Nuhnkuh in riti Doctrine and Covenants 128:15 ac sramsramkihn yohk srihpaciyacn oruh ke akwuck luhn tempuhl nuh sin mwet mahtuh lasr uh.

### MWE KAHSRUH

1. Liye Doctrine and Covenants 88:73.
2. *Teachings of Presidents of the Church: Brigham Young* (1997), 280.
3. *Teachings of Presidents of the Church: Joseph Smith* (2007), 409.
4. *Teachings of the President of the Church: Joseph F. Smith* (1998), 247.

## MWET FUHSR

### Kuh Nga Kuh in Engan in Sihmihs inen Mwet uh?

Sel Emma Abril Toledo Cisneros

**N**ga wi ke oruh ke finsrak luhn stek uh in tahkihn ine 50,000. Mutwacwacyac ah upac. Ke kais kuhtuh pacl uh un inen mwet nga downloadiyac ah upac in rityuck muhtuhn paholos, ac kuhtuh pacl uh nga ke fohlohkohlah ac downloadi sie sahyac. Tuhsruhktuh nga akihlacnwack lah fin mwet nuh kwewa nuhnkuh oacna, inen mwet ingacn fah an ne tok. Nga kuh in motko lain in mwet puhs tuhpan ke facluh luhn nguhn, ac nga sulaclah in tahfwelah srihke in riti ine ingacn ac suhmuhslah in tiac tahfonglac.

Nga lotwelah in oasr luhngse luhk nuh sin mwet ingacn. Nga kahlwem kac lah elos enenuh na pwacye kahsrueh, ac kuht enenuh pac kahsrueh selos. Nga etwac-lah wo lah plwacn fas luhn Pahpah Lucng nuhnkuh ke mwet nuh kwewa. Ke kuht ukwe mokleyuck ac ahkuhtweyack luhn mwet kol sollac Lal uh, kuht ac fah lohoh ke pahkotwen ac luhngse wacngihn sahflah Lal.

Sihmihs inen mwet uh oruh sie ohiyac na wowo nuh sihk. Nga etwac-lah in seko ac luhngse ma pucspucs ke sramsram mahtuh luhn sucu. Nga eis pac mwe sang ke ma sacohk yohk sin Leum lasr ke ahkosyacn ma fihsracsr oacna in wi sihmihs ke inen mwet uh.

*Mwet sihmihs sac el muhta Veracruz, Mexico.*

## TUHLIHK SRIHSRIHK

### Etuh Sramsram Keim an

**P**ahpah ninac ac pahpah ninac mahtuh kiyom an oasr muhtwacta pucspucs lalos—kuhtuh kom tiac etuh kac! Kuhtuh sramsram kaclos uh ac ahkisracsrueh kom, ac ac kuh in kahsrueh kom in oasr luhlahlfongi lom ke

Pahpah Lucng. Tuhsruhk finne mwet mahtuh uh mwe-kihn kuhtuh pacl uh. Orekmakihn kihsen siyuck inge in kahsrwelos esam kuhtuh sin sramsram sacohk lalos ac sihmihs kuh srohloh petsac ke top lalos an.

1. Sruhmuhn nuh sihk ke tolu mwe acsmakihn pwacr emet lom an.
2. Meac pacl ahkmwekihn se emet lom an?
3. Sruhmuhn nuh sihk ke lwen se ma nga isuslac ah.
4. Meac kom luhngse oruh ke kom tuh tuhlihk se ah?
5. Kom eis fuhkah fahkwack luhlalhfongi lom ke wosa-suc uh?

© 2014 sel Intellectual Reserve, Inc. Kuh ac suwohs nuh kwewa fihliyucki. Sihmlac fin acn USA. Ahkkweyeyucklac ke kahs English: 6/14. Ahkkweyeyucklac ke lweng: 6/14. Lwenglah luhn *First Presidency Message, June 2014*. Kosraean. 10866 868



Luhlahlfongi, Sucu, Kahsruh

# Misin Muhtahl luhn Jisus Kraist: Mwet Luti

*Pruhe in lutlutkihn kuhfa inge ac suk in etuh ma in akacsruhi kac. Etuh mouh uh ac misin luhn Mwet Lahngo ac ahkyohkye fuhkah kuh in luhlahlfongi lowos Kacl ac ahkinsewowoye mwet kowos liyacacng ke forfor luti uh? Nuh ke kuhtuh pac ma in etuh, som nuh ke relief society.lds.org.*

*Pa inge ip se ke Pweng ke Forfor Luti ma liyeyuck ke ma nuh kwewa ke misin luhn Mwet Lahngo.*

**K**e kuht mwet luti nuh sin mwet sahyac uh, kuht oruh mwet ukwe na pwacye luhn Jisus Kraist, suc akiyac mwe srihkasrak nuh sesr. Prestuhn Thomas S. Monson el fahk: “Kuht rauniyuckyak selos suc enenuh. . . . Kuht pa poun Leum inge fin facluh uh, ke kunohkohn se in kuhlwaacsap ac sruhk tuhlihk Nahtuhl uh.”<sup>1</sup>

Linda K. Burton, prestuhn luhlahp luhn Rilif Sosaiti, el luti: “Ke ahkpah, kais sie sesr kuh in oruh yohk in oacna Mwet Lahngo ke kuht kuhlwaacsapuh tuhlihk nuhtin God. In kahsrwe kuht in wo [mwet luti nuh] sin sie sin sie, nga luhngse fahk ke kaks ahkosr in esamyac: ‘Intein met, na kuhlwaacsap.’ . . . Ke kuht oruh ohinge uh, kuht liyacacng olweacng, ac kuhlwaacsap lasr, ma oacna Prestuhn Monson uh, fah oruh ahkpacyei ke ohiyacn mwet tuhma lutlut lasr uh.”<sup>2</sup>

Kuht kuh in pruhe ke kais sie lututacng in akihlen pacl wowo in kuhlwaacsapuh mwet sahyac. “Pahpah Lucng lac fah kol kom, ac lipu-facn uh fah kahsrwe kom,” David L.

Beck, prestuhn luhlahp luhn Mukul Fuhsr el fahk. “Ac fah utuckoht nuh sum kuh in ahkinsewowoye mouh ac molwelah nguhna uh.”<sup>3</sup>

## **Ke Ma Suhmuhsrah uh**

Mattu 20:25–28; 1 Nephi 11:27–28; 3 Nephi 28:18

## **Ke Sramsram Mahtuh Lasr**

Ke toeni luhlahp ke Ohktohp 1856, Prestuhn Brigham Young (1801–77) el tuhkahkihn lah paiyonir ma pahtpaht kuruma ah srackna fahsr tuhkuh ke acn tuhpahsrpahsr ac lah mwet nuh kwewa in tuh suhlahklahk kahsruh orwacni kuhfa nuh selos. Lucy Meserve Smith el suhmuhsrah lah muhtwacn uh “sahruhklah sikuct lalos [sikuct luhlahp], stakihn, ac ma nuh kwewa elos kuh in kahsruh kac, insac lun Lohm Alu sac, ac yolsacni nuh lun kuruma ah.”

Ke paiyonir pain moliyucklac ah muhtwacwacack fihli Salt Lake City ah, Lucy el suhmuhsrah, “nga tiac wi eis yohk . . . insewowe ke kuh-twena orekma nga oruh ke mouh luhk uh, kain insese luhn puhla se kuhtanglah. Nga enenuh na in som nuh ke stoh ah ac oruh in etweyuck

luhngse luhk; fin pa pohloh nuknuk se, ac srihkeyucki in tiac moliyuck.”<sup>4</sup>

Prestuhn George Albert Smith (1870–1951) el fahk ke oruh mwet luti nuh sin mwet sahyac: “Engan ma pahtpaht lasr uh fah tuhkuh fal nuh ke ohiyac ma kuht eis kuhtyang in kahsruh mwet sahyac.”<sup>5</sup>

## **Nuhkuh Ma Se Inge**

1. Pruhe uh ac kol kuht fuhkah in oruh mwe orekma nuh in poun Leum?
2. Oruh mwet luti nuh sin mwet sahyac uh kahsrwe kuht fuhkah in liyacacng olweacng lasr uh?

## **MWE KAHSRUH**

1. Thomas S. Monson, “Meac Nga Orwacrah nuh sin Mwet se Mihsenge uh?” *Liahona*, Nohfuhmpuh 2009, 86.
2. Linda K. Burton, “Intein Met, Na Kuhlwaacsap,” *Liahona*, Nohfuhmpuh 2012, 78, 80.
3. David L. Beck, “Kunohkohn Muhtahl Lom in Kahsruh,” *Liahona*, Mei 2013, 56.
4. Lucy Meserve Smith, ke *Daughters in My Kingdom: The History and Work of Relief Society* (2011), 36–37.
5. George Albert Smith, ke *Daughters in My Kingdom*, 77.

© 2014 sel Intellectual Reserve, Inc. Kuh ac suwohs nuh kwewa fihliuyucki. Sihmlac fin acn USA. Ahkkweyeyucklac ke kaks English: 6/14. Ahkkweyeyucklac ke lweng: 6/14. Lwenglah luhn *Visiting Teaching Message, June 2014*. Kosraean. 10866 868